

Merentas Desa Mewujudkan Semangat Perpaduan dan Kekitaan bagi warga SK Tanjung Aru.



Labuan, 15 Jan – Aktiviti merentas desa sesi 2019 yang dianjurkan oleh unit Ko-Kurikulum pada tahun ini disambut dengan begitu baik sekali oleh warga Tanjung Aru.

Antara objektif bagi aktiviti ini adalah untuk membina kecergasan fizikal dan mental murid dan guru melalui aktiviti sukan bagi membentuk individu yang cergas, memupuk semangat perpaduan dan kekitaan serta semangat berjuang dalam kalangan murid-murid dan guru-guru melalui pertandingan antara rumah-rumah sukan serta memilih wakil sekolah untuk pertandingan pada peringkat Negeri.

Aktiviti dimulakan dengan taklimat ringkas bersama PK Ko-Kurikulum sekolah, Encik Irham Bin Hamid dan diteruskan dengan aktiviti pemanasan badan yang diketuai oleh Puan Suliana Binti Amin bersama murid-murid.

Merentas desa dimulakan sebaik sahaja aktiviti pemanasan badan selesai. Ia disertai oleh semua murid tahap 2 yang terdiri daripada murid tahun 4 sehingga tahun 6 iaitu seramai 172 murid. Catatan masa terbaik murid ialah selama 20 minit 11 saat.

Antara murid yang mendapat catatan masa terbaik bagi kategori lelaki ialah adik Abuzar Ghifari Bin Kifli, adik Muhd. Isyraf Mikhail Bin Mohd Yussof dan Muhamad Haiqiel Ong.

Manakala catatan terbaik bagi murid perempuan ialah adik Nurfatin Erdanie Binti Mohd Rezal, adik Sharifah Syaedatul Syuhadah Binti Habib Kadir dan adik Roselyn Christina Reynold Gonzales.

Hadiah kemenangan disampaikan oleh perasmi aktiviti merentas desa iaitu Sarjan Mejar Mohd Ridwan Abdullah.



**Perhimpunan Bulanan JPWPL,
Januari 2019 : Pemansuhan
Peperiksaan Tahap 1**



Labuan, 8 Januari – Pentaksiran Bilik Darjah (PBD) merupakan kaedah pentaksiran yang bersifat autentik dan holistik, serta lebih berfokus kepada perkembangan dan pembelajaran murid dan bukan lagi berorientasikan peperiksaan.

Pelaksanaan PBD juga dapat mewujudkan budaya pembelajaran yang lebih menyeronokkan dan bermakna.

Pemansuhan amalan peperiksaan pertengahan tahun dan akhir tahun di Tahap 1 (Murid Tahun 1 hingga Tahun 3) adalah untuk membolehkan guru memberikan lebih penumpuan terhadap PdP yang dapat membina karakter dan sahsiah murid serta amalan nilai rutin harian.

Pelibatan ibu bapa juga penting dalam usaha menyediakan persekitaran pembelajaran yang kondusif dan bebas tekanan kepada murid di peringkat awal usia persekolahan.

PBD merupakan sebahagian daripada PdP di dalam bilik darjah dan dijalankan secara berterusan.

PBD secara sumatif dalam bentuk peperiksaan pertengahan dan akhir tahun diganti dengan aktiviti pentaksiran berupa projek mudah, kuiz, permainan, main peranan dan

bercerita.

Hasil kerja murid dinilai sebagai bahan pentaksiran yang dijalankan dalam PdP.

Pelaksanaan PBD bertujuan untuk mendapatkan gambaran tentang perkembangan dan kemajuan pembelajaran, mengenal pasti kekuatan dan kelemahan murid supaya tindakan susulan yang sesuai sama ada untuk meningkatkan atau memperbaiki pembelajaran murid dapat diambil secara serta-merta.

Di samping itu, PBD dapat memberi maklum balas tentang keberkesanan pengajaran guru.

Demikian penerangan Encik Raisin Saidin, Pengarah Jabatan Pendidikan Wilayah Persekutuan Labuan semasa berucap di perhimpunan bulanan bagi bulan Januari 2019 di BTPN Labuan hari ini, 8 Januari 2019.



Guru-guru mestilah bersungguh-sungguh dalam melaksanakan pentaksiran di bilik darjah bagi mengembangkan potensi dan kebolehan murid dalam pembelajaran. Encik Raisin Saidin.

Majlis perhimpunan diserikan dengan bacaan lafaz ikrar perkhidmatan awam, ikrar integriti perkhidmatan awam, ikrar Akta Rahsia Rasmi 1972, penyampaian sijil penghargaan dan sambutan hari lahir.

Jasamu dikenang kepada Puan Norismah Ab Moin, mantan Ketua Sektor Akademik dan Madam Chin Tsuey Wei, mantan SISC+ Bahasa Inggeris yang telah bersara juga turut diadakan dengan tayangan video dan penyampaian cenderahati persaraan.

Selamat Bersara Puan Norismah dan Madam Chin ! Seluruh warga Jabatan Pendidikan Wilayah Persekutuan Labuan mendoakan agar Puan Norismah dan Madam Chin sentiasa diberi perlindungan, kesihatan berpanjangan dan dimurahkan rezeki serta berbahagia bersama keluarga tercinta.



Sambutan hari lahir bagi bulan Januari kepada warga Jabatan Pendidikan WP Labuan

Hargai Murid, Tingkatkan Motivasi Murid Hadir Ke Sekolah



Labuan, 7 Januari – Hargai murid ke sekolah merupakan elemen penting dalam meningkatkan motivasi murid untuk hadir ke sekolah pada setiap hari persekolahan.

Pendekatan guru penyayang yang dilaksanakan di sekolah adalah antara kaedah mendekati murid-murid supaya rajin ke sekolah selain memastikan keselamatan mereka terjamin.

Pengarah Jabatan Pendidikan Wilayah Persekutuan Labuan, Encik Raisin Saidin ketika berucap pada Perhimpunan Pagi di Sekolah Kluster Kecemerlangan Sekolah Kebangsaan Ranche-Ranche berkata, kehadiran yang memberangsangkan murid-murid hadir ke sekolah setiap hari menandakan mereka seronok bersekolah dan rasa dihargai.

Guru-guru penyayang dan suasana sekolah yang menarik serta ceria adalah antara daya tarikan untuk murid-murid hadir ke sekolah setiap hari.



Salah satu inisiatif SKK Sekolah Kebangsaan Ranca-Ranca dengan memberi penghargaan semasa perhimpunan kepada murid yang hadir penuh ke sekolah

Antara inisiatif yang telah dilaksanakan oleh sekolah ialah program Sekolah Penyayang dan Transisi Tahun Satu.

Di sekolah-sekolah Labuan, bagi menghargai murid-murid yang hadir penuh ke sekolah, inisiatif oleh pihak sekolah bagi menarik minat untuk hadir ke sekolah seperti memberikan penghargaan dan hadiah yang disumbangkan oleh pihak Persatuan Ibu Bapa dan Guru (PIBG) sekolah.

Lawatan Jabatan Pendidikan Wilayah Persekutuan Labuan bagi melihat keadaan sekolah dan suasana persekolahan diteruskan di Sekolah Kebangsaan Patau-Patau dengan disambut oleh Guru Besar Encik Abd Rahman Salim.

Terdahulu, Encik Raisin Saidin bersama rombongan Jabatan Pendidikan Wilayah Persekutuan Labuan telah melawat Sekolah Kebangsaan Sungai Bedaun dan Sekolah Kebangsaan Bebuloh pada 3hb Januari 2019, serta lawatan hari pertama persekolahan di Sekolah Kebangsaan Layang-Layangan dan Sekolah Kebangsaan Pekan Dua pada 2hb Januari 2019.



Amalan guru penyayang oleh warga pendidik Sekolah Kebangsaan Sungai Bedaun bagi menghargai murid yang hadir ke sekolah



Minggu Transisi Tahun Satu Sekolah Kebangsaan Bebuloh untuk membantu murid baharu menghadapi perubahan dalam keadaan transisi dan pendidikan tidak formal di rumah atau Prasekolah ke arah pendidikan formal di Tahun Satu.

Kunjungan Ketua Polis Labuan Pada Hari Pertama Persekolahan



Labuan, 7 Januari – Ketua Polis IPD Labuan Superintendan Hj Mohamad Farid bin Ahmad dan rombongan telah membuat kunjungan ke Sekolah Menengah Kebangsaan Labuan pada 2hb Januari 2019 iaitu pada hari pertama persekolahan tahun 2019.

Ketika berucap dalam perhimpunan pagi, Superintendan Hj Mohamad Farid menyeru murid-murid sekolah sentiasa memberi tumpuan kepada pelajaran dan penglibatan dalam aktiviti-aktiviti sekolah yang bertujuan memupuk kebolehan diri serta meningkatkan kualiti sahsiah diri.

Murid-murid mesti mempunyai kekuatan untuk menghindarkan diri daripada risiko dan pengaruh yang tidak baik daripada rakan-rakan sebaya.

Kesilapan dalam membuat pertimbangan akan menjejaskan tumpuan kepada pelajaran dan usaha untuk mencapai sesuatu kejayaan.

Beliau juga berharap, murid-murid dapat bertindak sebagai mata dan telinga pihak polis , memberi maklumat berkaitan kegiatan-kegiatan tidak sihat yang berlaku dalam kalangan rakan-rakan.

Tujuannya supaya kegiatan tersebut dapat dibanteras dan murid-murid yang terlibat tidak terjerumus dalam kegiatan yang merosakkan masa depan mereka.

Pihak polis akan sentiasa membantu pihak sekolah dari segi pencegahan dan pembangunan diri murid-murid kerana itu merupakan sebahagian daripada sumbangan pihak polis kepada masyarakat.



Sementara itu, dalam ucapan aluan Pengetua SMK Labuan, Encik Ismail Abdullah, pihak sekolah sangat menghargai komitmen pihak IPD membantu sekolah dalam hal berkaitan pencegahan jenayah dan aktiviti-aktiviti tidak sihat dalam kalangan murid SMK Labuan.

Pihak sekolah telah mewujudkan medium komunikasi whatsapp bersama pegawai perhubungan polis untuk memudahkan penyaluran maklumat dari kedua-dua pihak.

Semoga kerjasama ini dapat membantu memudahkan usaha sekolah melakar kejayaan dan mencapai kecemerlangan dalam pelbagai bidang, memberi peluang kepada ramai murid terlibat dalam aktiviti-aktiviti yang boleh membawa nama baik SMK Labuan di peringkat negeri, kebangsaan dan antarabangsa.

Turut hadir DSP Firdaus bin Ramli, Ketua Bahagian Pencegahan Jenayah dan Keselamatan Komuniti, ASP Syed Asrul Sani bin Syed Adnan, Ketua Bahagian Siasatan Jenayah Narkotik IPD Labuan, merangkap Pegawai Perhubungan Polis SMK Labuan, ASP Sukvinderjeet Singh, Jabatan Pencegahan Jenayah dan Keselamatan Komuniti, IPD Labuan, En Mohd Nizam bin Yasim, Pegawai Sektor Pengurusan Akademik JPWP Labuan, merangkap Pegawai Angkat SMK Labuan, Ustazah Marziawati binti Mardan, Penolong Kanan HEM SMK Labuan, En Cheah Teong Aik, Penolong Kanan Kokurikulum, SMK Labuan, En Saminan bin Sabtu, Penolong Kanan Pusat Tingkatan Enam, SMK Labuan.



Dari Kiri, ASP Syed Asrul Sani, Encik Ismail, Encik Nizam, Superintendan Hj Mohamad Farid, DSP Firdaus dan ASP Sukvinderjeet Singh

Berita Oleh:

Encik Ismail Abdullah

Pengetua SMK Labuan

Penggal Persekolahan 2019 di Wilayah Persekutuan Labuan Bermula



Labuan, 2 Januari – Penggal Persekolahan 2019 di Wilayah Persekutuan Labuan bermula hari ini dengan mencatatkan seramai 16,633 orang murid berdaftar, peningkatan data sebanyak 606 murid berbanding 16,027 murid pada tahun 2018.

Bagi kemasukan murid ke Tahun Satu, seramai 1,635 murid memulakan sesi persekolahan di 17 buah sekolah rendah di Labuan pada tahun ini. Manakala bilangan murid prasekolah mencatatkan 807 orang murid.

Keseluruhan murid sekolah rendah termasuk prasekolah di Labuan adalah seramai 10,427 orang dan murid sekolah menengah pula seramai 5399 orang.



Pelaksanaan Minggu Transisi Tahun Satu Sekolah Kebangsaan Pekan Dua

Pengarah Jabatan Pendidikan Wilayah Persekutuan Labuan, Encik Raisin Saidin ketika berucap pada perhimpunan pagi di Sekolah Kebangsaan Layang-Layangan memohon agar murid-murid serta ibu bapa sentiasa mengamalkan kebersihan dan menjaga kesihatan diri setiap masa bagi memastikan murid hadir ke sekolah setiap hari.

Menurutnya lagi, Tahun 2019, peperiksaan bagi murid tahap satu iaitu dari tahun satu hingga tahun tiga telah dimansuhkan.

Pembelajaran tahap satu tahun ini adalah berpusatkan kepada murid melalui pendekatan didik dan hiburan,

pemikiran kreatif, berbentuk kuiz, bercerita, pelaksanaan projek-projek pembelajaran inovasi dan kreatif secara individu mahupun berkumpulan bagi mengasah bakat dan potensi serta kerjasama di kalangan murid.

Bagi pemakaian kasut pula, Encik Raisin Saidin berkata ianya tidak menjadi isu kerana pemakaian kasut sekolah berwarna hitam di semua sekolah kerajaan dan bantuan kerajaan hanya akan dikuatkuasakan sepenuhnya bermula 2021.

Dalam tempoh transisi tersebut (tahun 2019-2020), murid-murid boleh memilih sama ada menggunakan kasut sekolah berwarna hitam ataupun kasut sekolah berwarna putih.



Murid-murid Sekolah Kebangsaan Layang-Layangan : Dalam tempoh transisi tahun 2019-2020, murid-murid masih dibenarkan untuk memakai kasut berwarna putih